



官常典第六百五卷

監司部名臣列傳四

明四 馮應京

按明外史本傳應京字可大盱眙人萬曆二十年進士當官部曹會寧夏變起乞一邑自效尋以母憂不果起授戶部主事督薊鎮軍儲以廉幹聞尋調兵部進員外郎二十八年擢湖廣僉事分巡武昌漢陽黃州三府應京素勵行檢以命世自期至是繩貪墨摧姦豪風裁大著稅監陳奉橫恣巡撫支可大以下唯諾惟謹應京獨以法裁之然奉不能悛悟克萬端至伐塚毀屋剝孕婦溺嬰兒軍民人人思亂其年十二月有諸生妻被辱赴訴上官市民從者萬餘哭聲動地遂羣入奉廨欲與奉俱死諸司馳救乃免然其下多被傷應京因民不忍爲捕治其爪牙奉怒一日陽餉食而置金其中應京復暴之益慚恨明年正月置酒邀諸司以甲士千人自衛遂舉火箭焚傷民居民羣擁奉門號呼奉遣人擊之多死乃碎其尸擲諸途民益洶洶可大噤不敢出聲應京獨抗疏列其九大罪奉亦誣奏應京撓命凌勅使帝怒命貶雜職調邊方給事中田大益御史李以唐等交章劾奉乞宥應京帝

益怒除應京名是時襄陽通判邸宅推官何棟如棗陽知縣王之翰亦以忤奉被劾詔宅之翰爲民逮如遣棗俄以都給事中楊應文論救遂并逮應京宅之翰三人頃之奉又以抗拒誣劾武昌同知卞孔時孔時亦被逮緹騎抵武昌民知應京獲重譴則相率痛哭奉大書應京名列其罪榜之通衢士民見者益憤聚衆大譟至數萬人圍奉廨奉窘逃匿楚王府遂執其爪牙六人投之江并傷緹騎詈可大助虐焚其府門可大亦不敢出奉潛遣參隨三百人引兵追逐射殺數人傷者不可勝計日已晡猶紛紛相拏應京囚服坐檻車曉以大義乃稍稍解散奉亦心悸匿楚府逾月不出亟請還京大學士沈一貫因極言奉罪請立代還科道亦多言之帝猶未許俄江西稅監李道亦奏奉侵匿狀乃召還隸其事於承天守備杜茂頃之東廠奏緹騎有被擊死者帝愠甚手詔內閣欲究主謀一貫慮再激變力言民心宜靜請亟遣重臣代可大拊循因以侍郎趙可懷薦帝乃褫可大官令可懷馳往未至可大已遣兵護奉行舟車相銜數里不絕比可懷入境亦遣使護之奉得逡邐而去而應京之就逮也士民擁檻車號哭車不得行旣去則家爲位祀之三郡父老復相率詣闕訴寃帝不省吏科都給事中郭如星刑科給事中陳維春更連章劾奉帝怒謫兩人邊方雜職繫應京等詔獄考訊

久之不釋應京乃於獄中著書昕夕無倦三十二年九月星變修省廷臣多請釋繫囚於是應京及宅棟如獲釋之翰先瘞死而孔時繫獄如故應京志操卓犖學求有用不事空言爲淮西士人之冠出獄三年卒天啟初贈太常少卿諡恭節棟如無錫進士居官守正旣爲奉所陷襄陽人赴闕訟寃不聽及出獄削籍歸家居十七年天啟初始起南京兵部主事會遼陽陷時議募兵棟如自請行遂資帑金赴浙江得六千七百人甫至而廣寧復陷又自請出關視形勢乃進太僕少卿充軍前贊畫棟如志銳而才疎初在浙不能無浮費所募兵畏出關又多逃亡及是兩疏論賊廷弼王化貞功罪語頗侵當事給事中蔡思充朱童蒙御史陳保泰遂交章劾棟如棟如疏辨因請非時考察京官用清明黨朝貴益恨遂下詔獄榜掠備至五年秋竟坐贓戍滁陽崇禎初復官致仕卒之翰絳州人由鄉舉官棗陽力阻開礦遂被逮天啟初贈光祿少卿孔時旣長繫廷臣救者章數十上帝皆不省四十年萬壽節葉向高復以爲言乃削籍放還熹宗立起南京刑部員外郎

繆國維

按蘇州府志國維字四備吳縣人生未匝月父天秩死隨母張氏鞠於外祖家蒙其姓家貧苦學萬

曆辛丑成進士授南安知縣閩歲吏畏民懷已念母老不便就養乞改寧國府教授遷南京國子博士宅艱復除北雍陞營繕司主事主廣東鄉試復繆姓晉虞衡郎中出知温州府多善政擢貴州副使聞安會難作叱馭兼程抵任屯兵守新添衛枕戈坐甲者三閏月及圍解叙功當事抑之僅陞右叅政又以耿介不悅於巡按論鑄一級浩然賦歸性恬澹無欲敷歷二十餘載祿入外不持一錢任溫積贖鍰五百署事者函送至家峻却之黔省飭兵轉餉纖悉無染指故將士効命各城堡一時皆陷而新添獨存年六十卒於家

張所望

按松江府志所望字叔翹上海人萬曆辛丑進士除刑部主事奉使榮襄靖江三國錫予餽遺一無所受諸王敬焉轉員外郎郎中出爲衢州知府衢俗囂訟多引儒生爲証而奸民爲兩造師詭變競巧所望廉得主名單詞寸牘知出誰手剖決若神衢大治遷副使備兵蒼梧嶺表法令久弛所望至繕城隍實倉廩簡屯戍若藤峽昆侖鬼門句漏諸要害無不身歷窮山炎谷喜見大吏皆搏頸受約束有羅運獠者阻溪洞戕殺熟獠所望馳檄諭之遂輸貢爲編戶蓋漢以來所未賓也轉參政移治

左江左江遷隆峒長官黃兆基愛少子鎮西而殺長子鎮隆鎮隆有遺孤嘉祚當立吏目黃文舉挾鎮西爭讐仇殺累年所望率兵討平之將吏請郡縣其地邀延世賞所望曰師來定亂奈何斬人祀以自利乃誅文舉立嘉祚而還口不言功粵人善爲蠱所望獲其魁吳向春窮竟之滅其術擢廣東按察使不赴起爲湖廣按察使理漕政時方用兵急轉輸以勞悴疾作解職歸再起山東右布政使固辭所望清羸如不勝衣而執義強固當大事持正議侃侃不阿急人厄難無遺力常置女婢吳氏知爲故茶陵州孫也撫爲己女擇良士具奩飾而歸之年八十卒所著有梧潯雜佩嶺表游記幅員名義考文選集註辨疑龍華里志

王述古

按明外史本傳述古字信甫禹州人萬曆十七年進士除富陽知縣以才調崇德治尚簡靜不屑簿書期會以故不得大吏歡隨牒平進爲戶部主事又以崇德事誣謫知內丘入爲刑部主事歷郎中妖書獄起當事者欲窮治胡化以累郭正域述古力爭化得免楚王劾宗室華越等尚書蕭大亨欲以謀害親藩論死正域主謀與同罪述古又力爭且曰誰非高皇帝子孫一旦駢戮數十人勢且

激變戕殺大吏孰任其咎事亦止其後宗人果殺趙可懷人以是構述古先見三十二年出爲常州知府部內多貴族憚述古端介不敢干以私織造中貴道其境述古不出迎中貴怒訴之御史御史令其僚劑之述古曰幸語按君吾不爲側媚也其勁直如此父喪除起知保定舉治行卓異遷陽和兵備副使代王廢長子鼎渭立次子鼎莎廷議爭之二十年不決至是再下撫按勘巡撫汪可受初惑諸道監司議頗主鼎莎述古力辨其非且以秦府承和王惟耀事爲証可受大悟自是搖撼百端屹不爲動竟得改正述古之力也順義王禧力克卒其孫卜石兔當嗣而五路要挾不已邊臣又居之爲利迄五年封事不成述古博諏邊人得其要領言於當事曰夷性難厭惟堅持故事無所增減其心自定今忠順求婚兀慎擺腰諸酋求賞情更迫切操縱在我何爲倒持授人柄當事者初然之後五路擁衆城下諸將懼爭尤述古述古持益堅五路迄不敢肆已通事馮大梁交通事覺亡去浮賞盡裁五路絕望封事遂成時述古已進按察使錄功再進右布政使兵備如故命需次爲巡撫河南鄉試主考吏部員外郎周士顯發策言六經亂天下而有餘述古憤昌言曰自古小人未有毀六經者自王安石廢春秋國論無所取衷而中原遂淪於金因惡道學并追咎六經詆毀孔孟豈孔孟

亦當因東林連坐乎語聞於朝朝貴惡之會再舉卓異言路遂有駁之者未及遷而卒述古舉進士與高攀龍薛敷歐陽東鳳同出趙南星門後四人更相砥礪並以名節顯時論稱之

姜志禮

按明外史本傳志禮字立之丹陽人萬曆十七年進士歷建昌衛州二府推官入爲大理評事三十年以囚多瘐死疏言狂狷之間一日而斃者十五人積日而計亦何紀極又況海內小民罹災祲而轉死溝壑及爲礦稅之所羅織貂璫之所攫噬含冤而畢命者又復何限乞下德音凡囚罪可原者亟爲矜宥勿致淹繫愁苦無聊之民時賜賑卹且盡除礦稅毋使宵人竊弄魁柄賊虐蒸黎不報歷刑部員外郎出爲泉州知府遷廣東副使並有聲進山東右參政分守登萊時福王以帝愛子封國河南詔賜田二百萬畝跨山東湖廣之境及王旣之國遣中貴徐進來督賦勢甚熾志禮抗疏諫曰臣所轄二郡民不聊生且與倭爲鄰日勤保障其不宜有藩府莊田以擾茲土也明甚且自高皇帝迄今累十餘世封王子弟多矣有賜田二百萬頃延連數十郡者乎繼此而封尙有瑞惠桂三王也倘比例而請將予之乎不予之乎不予則疇非毛裏之親予之則將無地可給況國祚靈長久且

未艾嗣自天家子姓各援今日故事以請臣恐方內土田不足供諸藩分裂也帝得疏大怒貶三秩爲廣東僉事久之遷江西參議天啟三年由浙江副使入爲尙寶少卿尋進卿河南進玉璽魏忠賢欲志禮疏獻之志禮不可忠賢怒令私人劾其衰老遂乞休詔加太常少卿致仕已而削奪崇禎初復官志禮性淳朴所居多政績亦以行誼稱於鄉

孫同倫

按靖江縣志同倫字汝明登萬曆辛卯科賢書初任江西德化縣令蠲例金蘇驛困築封廓桑樂二洲石堤百餘里更置石閘以洩瀦水至今賴之陞湖廣荊州守豁羨丁出冤獄開誠布公得士民心未幾丞濟南駐廣寧職馬政積弊豪猾賂權要以羸馬獲善價倫痛治之後以守邊功奉廷議旌勞臣加銜運同隨擢守南安南安東連嶺表粵蠻蠢動諸如繕城濬隍修具飭備靡不先事綢繆屹然屏翰南安郡邑俱有生祠甲子推陞雲南屯田水利道清屯地嚴私鬻開金銀汁二河以資灌溉演民戶祝之丁卯轉本省曲靖兵備道參政賡捧闕下請告家居杜門掃軌履跡絕於公庭刺牘不出里雖至親罕覩其面生平修謹繩尺自將不苟言笑歷官二十餘年四拜恩綸得年八十有七預知

逝期里黨津津道之母張太淑人以節旌而同倫亦祀鄉賢

孫承榮

按濟南府志承榮號震南長洲人萬曆二十四年擢武兵備副使爲政寬嚴並用吏肅民安葺廟學杜請謁戢奸盜振興斯文尤加意窮民寒士嘗有餘米八百石盡給諸生時方承平承榮卽造火器聚火藥爲城守計民以孫佛稱之後轉山東左布政清節尤著

吳文企

按安陸府志文企號白雪萬曆戊戌進士除南戶部主權武林北新關減雜稅三百餘金有翼璫而虎者抵於法盡除其害出守寧波尋丁母憂家居五載補湖州守寇盜聞文企至皆解散備兵關西未幾調寧夏寧夏古朔方地叛服不常而銀定獨黯時有老僧爲邊人所尊信文企用其計畫銀定納款貢名馬事聞賈金賜秩一日忽夢幡幢鼓吹來迎遂端坐而逝

荆政方

按辰州府志政芳字山甫溆浦人學行俱優厚重無炫飾登永樂丙戌進士任交趾僉事復轉山東

以廉謹自守風紀凜然遠邇率服巡歷沱江聞傘員山有神曰媚娘常見怪形以要民祭乃作傘員移文勒碑以鎮之其怪乃息及歸箚中止銀三兩雖朝夕略無愠色

吳暉

按濟南府志暉字中陽萊蕪人萬曆戊戌進士任歸德司李毅直不阿觸直指怒被劾調鎮江理多所平反轉戶部郎管密雲糧儲密雲久呼庚癸暉至士馬飽騰司農異之歷轉肅州兵備副使暉飭將領勿得裁扣軍中懽呼曰數年來今始獲一飽願効死力於是兵民安堵又爲大同分巡道時大璫陳貴氣張甚暉抗直不少屈遂爲所中解綬歸

葛錫璫

按蘇州府志錫璫字中恬崑山人少穎悟萬曆丁酉舉於鄉辛丑成進士授刑部主事遷員外郎有兵部尙書私人受賄戎帥事露屬刑部庇之錫璫執不可卒按以法尙書引去直聲凜然出守兗州甫下車歲旱民饑力請賑濟躬歷二十七城全活甚衆貧生借倉穀者二百餘家歲荒無以償爲設法代補凡五百餘石魯邸在兗藩祿所需取之州縣徵解不時貧者坐困乃嚴爲立限按期給之其

宗人之不法者時加督率無不感且戢焉及分守河南值福王定封之國貉瑯滿路從者皆貴倨或入民居壞器物或撻負戴者於道民爲驚擾錫璠令人偵之得其筵者笞一二人乃不敢動會有旨錫福邸莊田十萬畝必取稅之不入者合三省給之時方以爲難適奸民有借仇家田投牒縣官者錫璠持之立置諸法三省肅然靈寶大盜聚黨千人將爲亂密授方略殲其渠魁餘黨散走中州以安進山東竟西道參政未行陞河南按察使請終養歸卒贈太常寺卿

馬人龍

按安慶府志人龍字霖雨萬曆甲辰進士授戶部主事以犒邊奏績奉命權潯江稅賈人德之爲立祠焉陞湖廣州守調繁武昌吏畏民懷治聲益著轉本省督學副使人龍校士公明衆論肅服尋以丁艱歸里服闋補三關兵備烽火不警隨轉粵西桂林道時苗獍大訐人龍修戰艘繕城郭禦之柳人賴之焉歷任湖廣分巡道後轉楚右藩庚午冬引疾乞休所著有楚才錄蕉園草諸刻行世

黃體仁

按松江府志體仁字長卿上海人萬曆甲辰進士時館李文節廷機家廷機使試館職體仁謝曰某

古今圖書集成
老矣不足以辱此選有門人徐光啟者博學而賢用世才也請以自代故光啟入翰林而體仁爲刑部主事遷員外轉郎中出知登州府罷坊市雜稅豪右斂手衛有明建文忠臣陳迪子孫尙在戍籍爲之陳乞脫伍又爲迪與戚繼光請諡秩滿擢東遼道副使值歲祲而福王之國舟車填湊體仁裁置以法因條上臺使盡革迎謁供億諸費民甚愛之而當路不悅罷歸所著奏議詩文雜著二十六卷撰續上海志田賦諸篇稱詳覈云

王繼美

按揚州府志繼美字雉食興化人萬曆丁酉中順天鄉試甲辰成進士授河南孟津縣調洛陽改福建順昌縣縣居劍州上游山水暴發漂民舍動至數千家繼美多造舟募善水者救援所活無算以忤巡按罷歸久之補知江西貴溪縣又以失撫臣指謫松江府學教授課士高等者同時獲雋十人咸服其明進南雍助教陞刑部主事轉戶部郎中總理密雲糧餉時遼初失守人心震驚多逗留不敢進繼美朝聞命夕戒途從者環泣不爲沮至密建議謂海內困於加派宜省冗濫清侵冒以寬民力按籍稽核剔逃亡得清省銀米二十餘萬并掃除銀三千兩歸諸朝前後受事者畏其軌已蹙

不上聞繼美抗言於部以頭搶地大呼高皇帝在天寶鑒臣美大司農爲之失色京師稱鐵郎中云於是科臣解學龍疏稱繼美視國如家宜優擢爲賢者勸奉旨超授山東布政司參議備兵兗東東齊久經白蓮賊蹂躪繼美念捕者以斬級爲功率多無辜移郡縣吏殲渠魁宥脇從凡不得已淪入妖黨者悉原之與大吏主勦意不合疏調簡繼美自以通籍久骯髒不得行其志徑拂衣歸卒時年七十三孫仲儒熹儒能世其家學

馬呈秀

按揚州府志呈秀字君實其先大同人父鳳以鹽筴占籍江都呈秀少孤嗜學登萬曆甲辰進士未拜官卽疏請終養及除服官大理凡奏疏諸牘援引經傳同列悚服出知延安徇賊入境親督兵捕擊擒其渠魁治延年收復流民萬戶墾荒田數萬畝入其租爲民充逋賦尙書趙彥稱之後任福建監司廉正持大體擒礦盜數百閩賴以安祀之名宦

蔣謹

按江陰縣志謹字欽之夙擅文譽萬曆壬辰選貢入南雍甲午舉應天亞魁丁未成進士尋丁外艱

服闋除中書舍人三奉使卻交際餽儀有清望當考選以門戶故量移工曹七年晉都水郎治河淮徐以曠工銀補工費畚鍤雲集夏鎮河使章謨任故謹兼攝籍公費三千金遣贈其子不入一錢九載績成擢江西叅政備兵南瑞省訟蠲贖四署司道篆俱如之乙丑冬奉表入賀不通贊謁逆黨曹欽程希璫旨喉田景新疏劾之摘其姻知高繆爲邪黨作詩及時政爲訕謗矯旨削奪歸灌園南郭外卹族賑貧施糜掩骼多爲德於鄉崇禎改元拜疏訟冤奉溫旨復職起用卽以其年臘杪一夕卒謹廉隅自飭門無雜賓歷仕二十餘年未嘗通書政府獨其廢置以高繆而卹典不及時論惜之詩文俱出匠心有紫微省綠漪軒望曉樓諸彙藏於家

邢慎言

按青州府志慎言字養敏號默庵益都人太保司馬公玠季子也少倜儻有大志工詩文善騎射留心世務見司馬故將吏諮諏兵餉情形悉皆諳識萬曆丁酉舉於鄉丁未成進士授戶部主事尙書趙世卿知其才使視奏草時章奏多沈閣惟慎言所裁定以時允行無滯者管九門鹽法綜理有程商民便之歷員外郎中寧前道僉事叅政繕城垣飭守具將吏肅然後以病歸卒

陳睿謨

按武進縣志睿謨字常采萬曆庚戌進士初授建安縣令再遷息縣令擢御史按蜀當安奢之變睿謨勵兵訓士蜀疆倚重逆璫魏忠賢勢焰建祠徧天下巡撫尹同臯諷睿謨睿謨正色曰豈不知建祠可以梯榮然不若留一塊乾淨土還朝廷禍福吾安之矣卒不建乃密疏曰惡璫熾焰中外建祠紛然惟蜀無有則能靖皇上封疆者無如蜀皇上何以處天下之不如蜀者未幾逆璫伏誅詔給勅命示褒嘉有逆璫肆毒砥柱獨高等語再按畿輔以薊門一疏忤執政出爲福建督糧道歷江臬楚藩禹州兵備土寇楊四拔猖數邑睿謨單騎統千戶劉定邦計擒之兩河寇喪胆不敢竊發捐俸修理禹州儒學造房四十餘間課士其中名曰潁濱書院請蠲河患地一百二十餘頃民至今德之載河南省志湖南北峒蠻犽犽蠢動朝議請復設偏沅鎮更置巡撫詔睿謨往是時賊在藍山者李荆楚等在桂陽臨武界者劉新宇等在天王寺者劉高峯等睿謨甫到賊已再攻湘圍長河睿謨授將士以方略屢戰皆捷三賊悉平旣而獻闕逼荆勢急楚撫臣疏請勅沅撫移鎮荊州護惠藩睿謨方至荆與撫臣策戰守而惠藩已微服出邸强睿謨保駕至岳州而荆陷矣使不强保駕至岳州荆事

尙有可圖睿謨深以爲恨無何卒所著有輔世編數十卷傳是堂文集奏疏數十卷閩豫蜀楚俱祀名宦子咨稷壬午舉人爲人端慤長厚積學能詩歷官刑部郎中恤刑畿輔活死囚無數捐馬跡山田百畝入宗祠爲婚葬等費陞雲南瀾滄兵備並睿謨崇祀鄉賢著草堂詩二卷

胡士容

按黃州府志士容字仁常萬曆庚戌進士授嘉定令調長洲累遷山西參議兵備薊州魏璫崔呈秀薦其妻弟爲材官拂然絕之有奸賊更捕急投崔氏第取論如法郡邑爲忠賢立生祠禁不許誣逮鎮撫獄擬賊七千薊人及長洲民聞之咸輸鏹以代崇禎初起參政駐甘州一夕無疾卒

魏士前

按安陸府志士前字瞻之萬曆庚戌進士授蕪湖令調吳江遷南戶部主事備兵潁州會龍華變起不數月戡定之及奸璫開屯江淮汝潁所在騷動士前調劑有法全活數萬人以忤璫免歸懷宗初補冀寧道平渠賊神一魁等轉川北道劾蜀藩御門僭制事再遷榆林道尋疏乞休戊子卒年六十